

ጾኑሲ ማደም ዳኪንቴ ጳውሎሴ ኪኢቶ ዔፕሶኔ ዓጮ ዓሶም ዓይያ ካር

ጳውሎሴ ዔፕሶኔ ዓሶም ፃኣፔ ኪኢታ ባሼና ዔርዛሢ፡- «ጾኑሲ ማሊያ ጮሪንጮና ሳዖናይዳ ዓኣ ባኮ ቢያ ፔቴ ማሂ፡ ፔቴ ኪሪሰቶሴ ቢታንቶ ዴማ ማሂሂኬ» ጋዓ ማሊያኬ (1:10)። ሃሃ ጊንሃ ዬሱሰ ኪሪሰቶሴና ማዒ ዓሲኮ ዜርሢ ፔቴ ማዓንዳጉዲ ሃያ ዴኤፖ ማሊያ ማደይዳ ዔያታ ፔኤሻንዳጉዲ ጾኑሲኮ ዴርም ዔርዛያኬ።

ዔፕሶኔ ኪኢቶኮ ዓይያይዳ ፃኣፓ ዓሢ ዓሲኮ ፔቴም ዛላ ዓርቄ ማሊያ ዳልጊሺሢሂና ጾኑሲ፡ ዓዳሢ ፔኤኮ ዴር ዎዲ ዶኣሬቴያ፤ ሃሃ ፔኤኮ ናዖ፡ ዬሱሰ ኪሪሰቶሴ ዛሎና ዔያቶኮ ጎማ ዓቶም ጌይንቴም ዎይቲ ዔያታ ጌኤሽኬቴያ ጾኑሲኮዎ ዴኤፖ ሃጊ ማዓንዳ ዎዛ ዓያና ጌኤዢ ዛሎና ዎይቲ ጎናዲ ዔርቴቴያ ኬኤዛኬ። ላምዓሲ ኬኤዛ ማሊያይዳ ፃኣፓ ዓሢ ሃና ኪኢቱሎናባባ ዓሶኮ ፔቴም ናንጋ ዔያቶኮ ኪሪሰቶሴና ዓኣ ፔቴማ ጎኔ ማዓንዳጉዲ ዎይቲ ዔያታ ናንጋንዳያ ኮይሳቴያ ኬኤዛኬ።

ዓሳ ኪሪሰቶሴና ዓኣ ፔቴምና ዎይቲ ፔቴይዳ ናንጋጊ ዳንዳዓቴያ ዴማ ዴማ ኮኣኪንሢ ማዓ ሃይሴና ኬኤዚንቴኔ፤ ዬይያ፡- ሺኢጲያ ማኣር ዓሳ ፔቴ ዑሢጉዲ ማዓዛ ኪሪሰቶሴ ቶኣካሢኬ፤ ሃሃ ሺኢጲያ ማኣር ዓሳ ማኣር ማዓዛ፡ ኪሪሰቶሴ ማኣርኮ ሃላሢኬ፤ ሺኢጲያ ማኣር ዓሳ ማቸጉዲ ማዓዛ፡ ኪሪሰቶሴ ዓኒጉዲ ማዓኔ፤ ፃኣፓ ዓሢ፡- ኪሪሰቶሴ ዛሎና ፔጋዴ ጾኑሲኮ ኮሹም ዒንጊያ ማርገና ሄርሺ ሄርሺ ኬኤዛ ዎዶና ኮሺ ዓኣሺንቴ ማሊሢ ኬኤዛኬ፤ ቢያ ባኣዚ ዒ ዛጋሢ ኪሪሰቶሴኮ ናሹምና ጾኑሲም ዒንጎ ባኣዚ ማዒ ዒንጊንቶና ጎም ዓሶኮ ዓቶም ጌይያና ዒዛኮ ኮሹም ዒንጊያና ጌኤሹምና ካንሢኬ።

ማፃኣፔላ ዲማ ዲማ ዓርቄ ባኮ

- ዓይያ ካር (1:1-2)
- ኪሪሰቶሴና ሺኢጲያ ማኣር ዓሶና (1:3—3:21)
- ኪሪሰቶሴና ጴዳ ዓኪ ናንጊ (4:1—6:20)
- ጋፒንሢ ሃይሴ (6:21-24)

1 ጾኑሲ ማሊሢና ዬሱሰ ኪሪሰቶሴ ማደም ዳኪንቴያ ማዒ፡ ጳውሎሴፓ ዬሱሰ ኪሪሰቶሴ ዛሎና ጉሙርቂንታያ ማዒ፡

ዔፕሶኔይዳ ዓኣ ያኦሲም ዲማዴዞንሢም፤

2 ኑ ዓዳሢ ኑኡኮ ያኦዞሢና ኑ ጎዳ ዩሱሰ ኪሪሰቶሴኮ ኮሹሞ ዒንጊያና ዎዞና ዒንሢም ማያሞ።

ኪሪሰቶሴ ዞሎና ጴዳ ዓያና ዓንጅ

3 ጫሪንጮይዳ ዓያና ዓንጅ ዒንጊሢና ኪሪሰቶሴ ዞሎና ኑና ዓንጅ፣ ኑ ጎዳ ዩሱሰ ኪሪሰቶሴኮ ዓድ ማዔ፣ ያኦዞሢ ጋላቲንቶንጎ።

4 ያኦሲም ኑ ዲማዴያ ሃሃ ሦሃሳ ባኣዚ ባኣያ ማዒ ዒዛ ቤርታ ኑ ጴዳንዳጉዲ፣ ዓጫ ማዢንቱዎንቴ ኪሪሰቶሴ ዞሎና ኑና ዒ ደኦሪሬ።

5 ያኦሲኮ ናሹሞና ዒዛኮ ኮሺ ማሊሢ ማዔም ዩሱሰ ኪሪሰቶሴ ዞሎና ዒዛኮ ኑ ናይ ማዓንዳጉዲ ቤርታዲ ዒ ማሌኔ።

6 ዩያ ዒ ማዴሢ ፔኤኮ ዒ ናሽካ ናዓሢ ዞሎና ጉሪ ኑም ዒንጊንቴ፣ ቦንቹንቴ ዒንጊያ ጋላቲንታንዳጉዲኬ።

7 ያኦዞሢኮ ኮሹሞ ዒንጊያ ሚርጉማፓ ዔቁያና ዒዛኮ ናዓሢ ሱጉያና ኑ ጎማፓ ጌኤሽኪ፣ ጎሜፓ ማኦሪንቲሢያ ኑ ዳንቄ።

8 ያኦሲ ፔኤኮ ኮሹሞ ዒንጊያ ፔ ዔራቶና ፔ ማሊያ ዳልጉሞና ሚርጊሺ ኑም ዒንጊጌ።

9 ሃሃ ዒዚ ፔ ኮሹሞና ኪሪሰቶሴ ዞሎና ቤርታዲ ዒ ማሌ ጎይያና ዒዛኮ ኮዢ ማሊያኮ ዓኣሺንቴ ባኮ ኑና ዔርዜኔ።

10 ያኦሲ ማሊያ ማዴይዳ ፔኤቃንዳሢ ጫሪንጮና ሳያናይዳ ዓኣ ባካ ቢያ ፔቱሞና ኪሪሰቶሴ ቢታንቶ ዳማ ማዓኣናኬ።

11 ቢያ ባኮ ፔ ማሊያና ማዳ፣ ያኦዞሢ ማሊያ ጎይያ ዒዛ ማሊያ ጋራ ኑ ማዔሢር ሃሢ ኪሪሰቶሴ ዞሎና ኑ ደኦሪንቴ።

12 ዩይ ያዲ ማዔሢ ቤርታዲ ኪሪሰቶሴይዳ ሃጊ ማዓንዳ ዎዞ ኑ ጌሢ ጎይያና ኑ ዞሎና ያኦሲም ቦንቶና ጋላታና ማዓንዳጉዲኬ።

13 ዒንሢያ ዒንሢኮ ዳቁንቶ ኮዢ ሃይሶ ማዔ፣ ጎኑሞ ቃኣሎ ዎይዜ ዎድና ኪሪሰቶሴ ዒንሢ ጉሙርቄኔ፤ ዒዚያ ዒንሢም ዒንጋኒ ሃጊ ማዓንዳ ዎዞ ማሃ ጌሢ፣ ዓያና ዒንሢም ዒንጊያና ዒንሢኮ ዒዛር ማዒያ ዔርቴኔ።

14 ያኦሲ ቦንቹንቲ ጋላቲንታንዳጉዲ ዒዚ ፔኤም ማዔዞንሢ ጎሜ ዓይሉሞይዳፓ ኬሲ ዔካንዳያ ሄላንዳኣና ዓያና ጌኤዢ ኑም ጌኢጊሾና ባኮ ዔኪሳኒ ዓይሢ ማሃ ዒንጎናያኬ።

ጳውሎሴ ዔፕሶኔ ዓሶም ሺኣቄ ሺኣጲ

15 ዩያር ጎዳ ዩሱሰ ኪሪሰቶሴና ዓኣ ዒንሢኮ ጉሙርቄያና ያኦሲም ዲማዴዞንሢ ቢያ ዒንሢ ናሽካ ናሹሞና ታ ዎይዚ፣

16 ታኣኒ ሺኢቃ ዎደና ቢያ ዒንሢሞ ማሊ ማሊ ዒንሢ ዛሎሮ ያኦሲ ጋላተዎ ሃሺባኣሴ።

17 ቦንቾ ኮይሳ፣ ኑ ጎዳሢ ዬሱስ ኪሪስቶሴኮ ዓዶ ማዔ፣ ያኦዛሢ ኮሺ ዒንሢ ዔራንዳጉዲ ዔራቶና ዓኣሺንቴ ባኣዚ ዔርዛያ ማዔ፣ ዒያና ዒንሢሞ ዒንገንታንዳጉዲ ታ ሺኢቃ።

18 ዎዚጉዴ ሃጊ ማዓንዳ ዎዛሞ ዒንሢ ዔኤሊንቴቴያ፣ ሃሃ ጌኤዦ ዓሳ ዔካንዳ ቦንቾንቴ ባካ ዎዚጉዲ ዲቤቴያ ዒንሢ ዔራኒ ዒና ዒንሢኮ ቡሊንታንዳጉዲ ጌዒ ታ ሺኢቃ።

19 ዬያጉዲ ሃሃ ኑና ኪሪስቶሴ ጉሙርቃዞንሢሞ ጌኣገንቴ ዎልቃ ዎዚጉዲ ዶዲ ማዔቴያ ዒንሢ ዔራንዳጉዲ ታ ሺኢቃ፤ ዬያ ኑጊዳ ማዳ ፑኤፖ ዎልቆ፣

20 ያኦሲ፣ ዓዳሢ ኪሪስቶሴ ሃይባፓ ዔቁሶና ጫሪንጮይዳ ፔኤኮ ሚዛቆ ዛላ ዴይሢያና ኪሪስቶሴ ዛሎና ዳዌ።

21 ዒዚ ኪሪስቶሴ ጫሪንጫ፣ ፔኤኮ ሚዛቆ ዛላ ዴይሢሢ ዓይጎ ካኣታቶና ቢታንቶናኮ ዎልቁሞና ጎዳቱሞናኮዎ ዑፃሲኬ፤ ዬያጉዲ ሃያ ዓጫ ሌሊቱሞንቴ ሃጊ ሙካንዳ ዎዶይዳኣ ሱንሢፓ ቢያ ዑሣ ዓኣፎ ቦንቾንታ ሱንሢ ዒዛሞ ጌሢኬ።

22 ቢያ ባኣዚ ዒዛ ቢታንቶኮ ዴማ ማዓንዳጉዲ ማሃኔ፤ ሺኢጲዎ ማኣሮ ዓሶና ቢያ ባኣዚኮዎ ዑፃ ማሃ፣ ዶኦሪ ጌሢኬ።

23 ሺኢጲዎ ማኣሮ ዓሳ ዒዛ ዑፃ ኩሙሢ ማሃያ ማዓዛ፣ ቢያ ባካ ዒዛና ኩሙሢ ማዓኔ።

2

ኪሪስቶሴና ሃይቢፓ ናንጊ ባንሢ ፒንቁሢ

1 ዒንሢ ዒንሢኮ ዳቢንቶና ጎሞ ዛሎና ቤርታ ዓያኖ ናንጎ ዛሎና ሃይቁያኬ፤

2 ዬያ ዎደና ሃያ ዓጮኮ ፑርቶ ማዶ ማዲ ማዲ ዳቢንቲና ጎሚናይዳ ዒንሢ ናንጋያኬ፤ ዬያጉዲ ሃሃ ሳዎኮ ዑፃ፣ ዠባራ ዓኣ ፑርቶ ዓያኖ ዓይሢሢ፤ ሃሢያ ያኦሲሞ ዓይሢንቱዎ ዓሶ ቆላሢሢ ዒንሢ ኩንሢ።

3 ኑኡኒያ ቢያሢ ዬያ ዓሶ ባኣካ ኑኡኮ ዓሱሞ ማሊዎ፣ ዒኖሲ ኩንሢ ኩንሢ ሃያኮ ቤርታ ኑሞ ኮይሳ ጎይሢ ኑ ናንጋ፤ ሃሃ ዓቴ ዬያ ዓሶጉዲ ኑ ሸይንታፓ ዓርቃዎ ያኦሲ ዳጋሳ ዓሲኬ።

4 ጋዓንቴ ማኣሪያና ዖርጎቺ ማዔ ያኦዛሢ ኑና ዒ ናሽኬ፣ ዴኤፖ ናሹማፓ ዔቁያና፣

1:20 ዓይኑ. 110:1። 1:22 ዓይኑ. 8:6። 1:23 ቆላ. 1:18።

5 ዎዚ ኑ ዳቢንቶና ሃይቄያ ማዔቴያ ኪሪሰቶሴና ናንጊ ኑም ያኦሲ ዒንጊኔ፤ ዒንሢያ ዳቄሢ ዒዛኮ ኮሹሞ ዒንጊያናኬ።

6 ያኦሲ ዩሱሰ ኪሪሰቶሴና ዎላ ኑና ሃይባፓ ዔቂሲ፣ ዩሱሴና ዎላ ጫሪንጫ ዒ ዓኣ ቤዛ ኑና ጌሢኔ።

7 ዩያ ዒ ማዴሢ ሙካ ዎዶይዳ ዩሱሰ ኪሪሰቶሴ ዛሎና ፔ ኮሹሞና ኑም ፔጋሲ ዳዎ ኮሹሞ ዒንጊያ ሚርጉሞ ዔርዛኒ ኮዒኬ።

8 ዓይጎር ጌዔቴ ዒንሢ ዳቄሢ ጉሙርቂሢና ያኦሲኮ ኮሹሞ ዒንጊያ ዛሎናኬ፤ ዩይ ያኦሲ ዒንጊሢ ማዓንዳኣፓዓቴም ዒንሢ ማዶና ጴጴያቱዎሴ።

9 ሃይ ዳቄንታ ጴጴሢ ማዶናቱዎአሢር ዓይጎ ዓሲያ ሄርሺንታኒ ኮይሱዎሴ፤

10 ዓይጎር ጌዔቴ ኑኡኒ ቤርታዲ ያኦሲ ጊኢጊሹ፣ ኮዦ ማዶ ማዳንዳጉዲ ዩሱሰ ኪሪሰቶሴ ዛሎና ማዢንቴ ያኦሲ ማዢንቴኬ።

ኪሪሰቶሴና ጴጴ ፔቱሞ

11 ዩያር ዒንሢ ቤርታ ሸይንቶና ዓይሁዴ ማዒባኣ ዓሳ ዓይሁዶ ዓሳ ዔያቶኮ ዓቲንቶ ቤርቶ ዓሲ ቲቄያታንቴ ሄርሺንቲ ሄርሺንቲ፡- «ዒንሢ ዓቲንቶ ቤርቶ ቲቄንቲባኣዘንሢ ሃይ!» ዒንሢ ጋዓሢ ማሉዎቴ።

12 ዩና ዎዶና ዒንሢ ዒሰራዔኤሌ ዜርሢ ጌይንቱዎፖ ሃሣ ቤርታ ዔያቶም ጫኣቆና ጫኣቄሞኮ ዙላ ማዒ፣ ሃያ ዓጮይዳ ሃጊ ማዓ ዎዛ ባኣያ ማዒ ጊንሣ ያኦሲዳፓኣ ዲማዲ ኪሪሰቶሴያ ዔሩዎፖ ዒንሢ ናንጋኔ።

13 ሃሢ ጋዓንቴ ቤርታ ዒንሢ ሃኪ ዓኣ ዓሳ ዩሱሰ ኪሪሰቶሴ ዛሎና፤ ሃሣ ዒዛኮ ሱጉያና ያኦሲ ባንሢ ዒንሢ ዑኬኔ።

14 ቤርታ ኑና ፓቂ ዎላ ካኣም ላኣጌ ባኮ ሺኢሺ፣ ዓይሁዶና ዓይሁዴ ማዒባኣ ዓሶና ፔቴ ማሂ ቡኩሴሢ ኪሪሰቶሴኬ።

15 ኮሹሞ ዒንጋኒ ላምፖ ዴርይዳፓ ዒዛና ፔቴ ማዓ፣ ፔቴ ዓኪ ዜርሢ ማሂ ማዢኒ ዎጎኮ ዓይሢያና ማዶ ጎይያና ፔ ሃይቦና ባይዜኔ።

16 ኪሪሰቶሴ ፑርቶ ዓሶ ሱያ ሚያይዳ ሃይቄ፣ ዎላ ካኣሙዎ ዓሶዎ ካንሢ ላምፖ ዜርያ ፔቴ ማሂ ያኦሲና ዎላ ቡኩሴኔ።

17 ዒዚ ሙኪ ዒንሢ ያኦሲፓ ሃኪ ዓኣ ዓሶና ዑኬ ዓኣ ዓይሁዶ ዓሶናም ኮሹሞ ዛላ ኬኤዜኔ።

18 ዩያር ኑኡኒ ቢያሢ ዒዛ ዛሎና ፔቴ ዓያናና ማዒ ዓዳሢ ባንሢ ሙካኒ ዳንዳዓኔ።

2:5 ቆላ. 2:14። 2:16 ቆላ. 1:20። 2:17 ዒሲ. 57:19።

19 ዓካሪ ዒንሢ ጾኦሲም ዲማጅዞንሢና ዎላ ፔቴ ዓጪ ዓሲ፤ ሃሣ ጾኦሲ ማኣሪ ዓሲ ማዓንዳኣፓዓቴም ሃካፓ ሴካ ዒንሢ ሾኦቸና ቤቴ ሙኬ ዓሲናቴዎሴ።

20 ጾኦሲ ማጅም ዳኪንቴዞንሢና ጾኦሲ ማሊያ ኬኤዛ ዓሳ ዓርቄ ቦኦኮላሢዳ ዒንሢ ማኸንቴኔ፤ ማኣሮኮዎ ሄሎ ማዔ ሹጫሢ ዩሱሰ ኪሪሰቶሴኬ።

21 ማኣሮ ማኸ ባካ ቢያ ዒዛና ካኣሚ ካኣሚ ጎዳም ዲማጅ ጌኤሺ ማኣሪ ማዓኒ ማኸንጎታኔ።

22 ጾኦሲ ፔ ዓያኖና ዎርቃ ማኣሪ ማዓንዳጉዲ ኪሪሰቶሴ ዒንሢያ ማኸኔ።

3

ጳውሎሴ ዓይሁዳ ማዒባኣ ዓሶም ማጅ ባኮ

1 ዬያር ዒንሢ፣ ዓይሁዳ ማዒባኣ ዓሶም ዩሱሰ ኪሪሰቶሴ ዛሎና ማጅሢሮ ቱኡቴ ዓኣ፣ ታኣኒ ጳውሎሴ ጾኦሲ ሺኢቃኔ።

2 ዒንሢም ታ ማኣዳንዳ ማጅ ኮሹሞ ዒንጊያና ጾኦሲ ታኣም ዒንጌሢ ዒንሢ ዎይዘኔ።

3 ቤርታ ታ ዒንሢም ዳካና ፃኣፔሢጉዲ ጾኦሲ ዓኣሺንቴ ባኣዚ ታና ፔጋሲ ጳዌኔ።

4 ሃሢ ታ ዒንሢም ፃኣፔሢ ዒንሢ ናባቤቶ ኪሪሰቶሴ ዛሎ ዓኣሺንቴ ባኮ ታ ዔሬያ ማዔሢ ዒንሢም ጴዳንዳኔ።

5 ዬይ ዓኣሺንቴ ባካ ጾኦሲ ዓያኖ ዛሎና ጾኦሲም ዲማጅ፣ ዒዛ ማጅም ዳኪንቴዞንሢና ዒዛኮ ማሊያ ኬኤዛዞንሢም ሃሢ ጴጅ ጎይያ ሚናኣ ዎደና ዓኣ ዓሶም ጴዲባኣሴ።

6 ዬይያ፡- ኮኸ ሃይሶ ዛሎና ዓይሁዳ ማዒባኣ ዓሳ ዓይሁደ ዓሶና ዎላ ጾኦሲ ዒንጋ ዓንጅ ዔካያ፣ ፔቴ ዑሢኮ ዲማ ዲማ ቤዞጉዲ ማዓያ ሃሢ ጾኦሲ ዩሱሰ ኪሪሰቶሴ ዛሎና ዒንጌ ሃጊ ማዓንዳ ዎዞ ዎላ ዔካያ ማዔሢ ዔያቶም ጴዲባኣሴ ጌይሢኬ።

7 ጾኦሲ ፔ ዎልቆና ማጳ ጎይያ ታኣም ዒንጌ ኮሹሞ ዒንጊያና ሃያ ኮኸ ሃይሶ ማጅ ታ ማጳያ ማዔኔ።

8 ዎዞ ታኣኒ ጾኦሲም ዲማጅ ዓሶይዳፓ ላኣፓ ማዔቴያ ዛጳባኣ ኪሪሰቶሴኮ ዎርጎቹሞ ዓይሁዳ ማዒባኣ ዓሶም ታ ኬኤዛንዳጉዲ ሃይ ኮሹሞ ዒንጊያ ማጳ ታኣም ዒንጊንቴኔ።

3:6 ቆላ. 1:26-27።

9 ዩያጉዲ ሃሣ ቢያ ባኮ ማገፍ የአዛሢ ሃያኮ ቤርታኦ ዋደይዳ ዓኣቺ ገሢሣ ዓኣ ዲዛኮ ማሊፃ ዓይጎ ማዕቲያ ቢያሢም ታ ዔርዛንዳጉዲ ሃይ ኮሹሞ ዒንጊያ ማዳ ታኣም ዒንጊንቴኔ።

10 ዩይ ማዕሢ ሃሣኣ ዋደ ሺኢጲያ ማኣሮ ዓሰ ዛሎና ጫሪንጫ ዓኣ ሱኡጎና ቢታንታ ዓኣ ማዢንቶና የኦሲኮ ዔራቶዋ ዲማ ዲማ ጎይሢና ዔራንዳጉዲኬ።

11 ኑ ጎዳ፣ ዩሱሰ ኪሪቶሰቶሴ ዛሎና የኦሲ ዩያ ማዳሢ ቤርታፓ ሳርቃያ ማዳኒ ማሌ ጎይያናኬ።

12 ኪሪሰቶሴ ኑ ጉሙርቁ ጎይያና የኦሲ ቤርቶ ዒጊቹሞ ባኣያ ደዲ ኪሪሰቶሴና ኑ ሙካኒ ዳንዳዒ።

13 ዩያሮ ሃይ ታና ዒንሢ ዛሎሮ ሄሌ ሜታሢ ዒንሢኮ ቦንቾ ማዕሢሮ ሃጋኣ ዋዛ ባኣያ ዒንሢ ማዑዋጉዲ ታ ዒንሢ ሺኢቃኔ።

ጳውሎሴኮ ዴፕሶኔ ዓሰም ሺኢጲያ

14 ዓካሪ የኦሲ፣ ዳዳሢ ቤርታ ጉሞዓቲ ታ ሺኢቃሢ ዩያ ዛሎኬ።

15 ጫሪንጫና ሳያናይዳ ዓኣ ፔቴ ማኣሮ ዓሰ ሱንያ ዴንቃንዳሢ የኦሲዳፓኬ።

16 ዒንሢኮ ጋሮ ዒሮ ደዲሻ ዋልቁ፣ ዓያሮ ዛሎና የኦሲ ፔኤኮ ቦንቾ ዴኤፑማፓ ዒንሢም ዒንጋንዳጉዲ ታ ሺኢቃኔ።

17 ዩያጉዲ ሃሣ ዒንሢኮ ጉሙርቁያና ኪሪሰቶሴ ዒንሢ ዒና ናንጋንዳጉዲ፤ ሃሣ ዒንሢኮ ፃጸና ዓይያና ናሹሞና ደዲ ማዓንዳጉዲ ታ ሺኢቃኔ።

18 ሃሣ ጊንሣ ኪሪሰቶሴ ናሹሞኮ ዳልጉሞ፣ ያደሱሞ፣ ዴጉሞ፣ ሊካ ዔታዲፃኣ ዋማዒታቴ የኦሲም ዲማዴዘንሢንታ ቢያ ዒንሢ ዔራንዳጉዲና፤

19 ዔርታያፓ ዑሣ ዓኣዴ ማዕ፣ ኪሪሰቶሴኮ ናሹሞ ዒንሢ ዔራንዳጉዲና የኦሲ ፓጩ ባኣዚ ባኣያ ማዕሢጉዲ ዒንሢያ ያዲ ማዓንዳጉዲ የኦሲ ታ ሺኢቃኔ።

20 ዩያሮ ኑጊዳ ማዳ ዋልቆ ዛሎና ኑ ሺኢቃሢና ማላሢናይዳፓ ዑሣ ዓኣዴ ማዳኒ ዳንዳዓ የአዛሢም፣

21 ሺኢጲያ ማኣሮ ዓሰና ዩሱሰ ኪሪሰቶሴ ዛሎና ዋደ ቢያይዳ ቦንቾ ዒዛም ማያንጎ።

4

ኪሪሰቶሴ ዓኣ ዓሰኮ ፔቱሞ

1 ዓካሪ ያኦሲ ዒንሢ ናንጎንጎ ጌዒ ዔኤሌ ናንጎ ዒንሢ ናንጎንዳጉዲ ጎዳ ማዶ ዛሎሮ ቱከንቲ ዓኣሢ፥ ታኣኒ ዒንሢ ሺኢቃኔ።

2 ቢያ ዎዴ ሴካና ሃንጋና ዎሊ ናሽኪሢና ሃሃ ሚጨንቲሢና ኮሹሞና ዳንዳዒሢና ዓኣያ ማዒ ናንጉዎቱ።

3 ኮሹሞና ናንጊ ናንጊ ዓያኖ ጌኤዡ ዛሎና ጴዳ ፔቱሞ ናንጎ ዶዲ ካፑዎቱ።

4 ዒንሢ ፔቱ ሃጊ ማዓ ዎዛሞ ዔኤሊንቲያ ማዔሢጉዲ ፔቱ ዑሢና ፔቱ ዓያናና ዒንሢኮ ዓኣኔ።

5 ዬያጉዲ ሃሃ ፔቱ ጎዳ፥ ፔቱ ጉሙርቁሢና ፔቱ ዎኣሢ ማሰቲሢና ዓኣኔ።

6 ሃሃ ዬያ ቢያይዳጋ ዑሃ ማዔ፥ ቢያሢና ማዳ፥ ቢያሢና ናንጋ፥ ቢያሢኮ ዓዶ ማዔ፥ ፔቱ ያኦሲ ዓኣኔ።

7 ጋዓንቲ ኪሪሰቶሴ ዒንጋኒ ማሌ ጎይያ ኑና ፔቱ ፔቲሢሞ ያኦሲኮ ኮሹሞና ዒንጎ ዒንጊፃ ዒንጊንቲኔ።

8 ዬይያ፦

«ሌካ ዒ ኬሰኬ ዎዶና ሚርጌ ዓሲ ዲዒ ዔኪ ዒ ዓኣዴኔ፤

ሚርጌ ዓሲማኣ ሚርጌ ዒንጊሢ ዒንጌኔ»

ጌይንቲሢ ጉዲኬ።

9 ዓካሪ «ሌካ ኬሰኬ» ጌይፃ ሊካ ሳዎ ዴሞ ኬዴያ ማዒባኣያታቲ ሚሌ ዓይጎ ዳዎይ?

10 ዬይ ሊካ ዴሞ ኬዴሢ ሳዎና ጫሪንጮና ዒኢካ ዓኣ ባኮ ቢያናይዳ ጴዳያ ማዒ ጫሪንጮኮ ቢያ ዑያ ኬሰኬሢኬ።

11 ዒዚ ፔቱ ፔቲሢ ያኦሲ ማዶሞ ዳኪንቲዘንሢ፥ ያኦሲ ማሊያ ኬኤ ዛዘንሢ፥ ኮዡ ሃይሶ ኬኤ ዛዘንሢ፥ ያኦሲ ዓሶ ሄንቃዘንሢና ዔርዛዘንሢ ማዓንዳጉዲ ዒንጊሢ ዒንጌኔ።

12 ዬያ ዒ ማዳሢ ዒዛኮ ዑያ ማዔ፥ ሺኢጲያ ማኣሮ ዓሶ ዲቻኒና ዒዛ ጉሙርቃ ዓሶ ያኦሲ ዓሲ ማዳ ማዶ ማዳንዳጉዲ ጊኢጊሻኒኬ።

13 ዬያጉዲ ሃሃ ያኦሲ ናዓሢ ጉሙርቁሢና ዔሪሢ ዛላና ጴዳ ፔቱሞ ዴንቁ፥ ኪሪሰቶሴ ፓጮፍ ባኣዚ ባኣያ ኩሙሢ ማዔሢጉዲ ኑኡኒ ኩሙሢ ዓሲ ማዓንዳጉዲኬ።

14 ዓካሪ ሃካፓ ሴካ ዓሶኮ ዳቢሻ ጌሺያ ዔርዚያ ዢባሮና ሴካ ሃንጋ ጌዒ ጌዒ ናይ ኑ ማዓዓኬ።

15 ዬያይዳጋ ጎኑሞ ናሹሞ ዓያናና ጌሰቲ ጌሰቲ ቶኦካሢ ማዔ፥ ኪሪሰቶሴ ማላኒ ቢያና ኑ ዲዲጫንዳኔ።

16 ዑዎኮ ዲማ ዲማ ዓኣ ቤዛ ካኣማሢ ኪሪሰቶሴናኬ፤ ዑፃ ቢያ ዎላ ዓርቂንቲ ዓኣሢ ዲማ ዲማ ካኣማ ካራናኬ፤ ዬያሮ ፔቴ ፔቴ ዑዎኮ ቤዛ ፔኤም ዒንጊንቲ ማዶ ማዳዛ፡ ዑፃ ቢያ ናሹሞና ዲጩ ዲጩ ዴኤፓኔ።

ኪሪሰቶሴና ጰዳ ዓኪ ናንጊ

17 «ሃይፓ ሴካ ፓሁቆ ማሊሢና ናንጋ፡ ዓይሁዴ ማዒባኣ ዓሰጉዲ ናንጊፖቴ» ጌዒ ጎዳ ሱንፆና ታ ዒንሢም ላቲ ዘራኔ፤

18 ዔያቶኮ ዒና ባይቂያይዳፓ ዔቂያና ዔያታ ጰቂሁቆኣሢሮ ዒና ዔያቶኮ ዲማኔ፤ ፆኦሲ ዒንጋ ናንጎይዳፓኣ ዔያታ ሃኬኔ።

19 «ዓሲ ዎዚ ጋዓንዳይ» ጋዓ ማሊሢ ዔያቶኮ ባይቂሢሮ ፔና ፑርታ ማዶም ዓኣሢ ዒንጌኔ፤ ዬያሮ ቢያ ዎዴ ቦርሲሳ ባኣዚ ማዳኒ ኮሺ ዔያታ ኮዓኔ።

20 ዒንሢ ጋዓንቲ ኪሪሰቶሴ ዛሎና ዔሬሢ ያዲቱዎሴ፤

21 ጎኔና ዒንሢ ዒዛ ዛሎ ዎይዜኔ፤ ጎኑሞ ዬሱሴና ዓኣሢያ ዒዛይዳፓ ዒንሢ ዔሬኔ።

22 ዬያሮ ጌሺ ዒንሢ ጎሜ ባንሢ ዔኪ ዓኣዳ ማሊያና ፑርቲያ፡ ማና ቤርታ ዒንሢ ናንጋ ናንጎ ሃሹዎቴ።

23 ዒና ዒንሢኮ ላኣሚንቲ ዓኪ ማዎንጎ።

24 ጎኔ ጸሎሞና ፆኦሲም ዲማዲሢና ፆኦሲ ማላኒ ማኸንቲ ዓኪ ዓሲ ማዑዎቴ።

25 ዬያሮ ሉኡዙሞ ጌሰቲፖቴ! ቢያሢ ኑኡኒ ፔቴ ዑሢኮ ዲማ ዲማ ቤሲ ማዔሢሮ ሴካና ሃንጋና ጎኑሞ ኑ ጌሰቶም።

26 ዒንሢ ዳጋዴያ ማዔቴያ ጎሜ ማዓንዳ ጎይሢ ዔኪ ዓኣዲፖቴ፤ ዳጎ ዒንሢኮ ዒንሢ ሃሹዎንቲ ዓቢ ጌሎፓ፤

27 ሃሢ ፃላሃማኣ ቤሲ ጌሢፖቴ።

28 ዉኡቃያ ዓኣቴ ሃይፓ ሴካ ዉኡቆፓ፤ ዬያይዳፓ ማታዳ ዓሲያ ማኣዳንዳ ማኢሹ ዴንቃኒ ፔ ኩቻ ደዲ ማማዶንጎ።

29 ፔቴታያ ዒንሢኮ ዳንጋፓ ፑርታ ዑኡሲ ኬሰኮፓ፤ ጋዓንቲ ዓሲ ደዲሻያና ፓሢ ባኣዚና ጌሰቱዎቴ።

30 ዒንሢ ጋፒ ዓይላቶፓ ሻንቂንቲ ኬሰካንዳ ኬሎ ጎናሲ ዔርዛኒ ፆኦሲ ዒንሢም ዒንጌ፡ ጌኤኩ ዓያኖ ያዩሲፖቴ።

31 ዒንሢዳፓ ፑርቲሞ ማሊሢ፡ ዳጋ፡ ጎሪንቲ፡ ዒላቲ፡ ጩሺንታ ዓይጌያ ፑርታ ባኣዚ ቢያ ሃኮንጎ።

4:16 ቆላ. 2:19። 4:22 ቆላ. 3:9። 4:24 ማኸ. ማፃ 1:26፤ ቆላ. 3:10።
4:25 ዛካ. 8:16። 4:26 ዓይኑ. 4:4።

32 ዎላ ሴካና ሃንጋና ኮቪ ዓሲ ሃሃ ዎሊም ማላ ዓሲና ማዑዎቲ፤
ጾኦሲ ኪሪሰቶሴ ዛሎና ዒንሢም ዓቶም ጌዔሢጉዲ ዒንሢያ ዎሊም
ዓቶም ጋዒያ ማዑዎቲ።

5

ፖዒ ናንጊ ናንጊሢ

1 ዓካሪ ዒንሢ ጾኦሲ ዒንሢ ናቫካያ፡ ዒዛኮ ናኣቶ ማዔሢሮ ዒዛ
ማሎዎቲ።

2 ኪሪሰቶሴ ኑና ናቫከሢና ጾኦሲ ዎዛሳ ሳውሞ ዓኣ ዒንጎ ባኣዚ
ማሢ ፔ ቪምፓሢ ኑ ጋይቲ ዓኣሢ ዒንጌሢጉዲ ዒንሢያ ናቩሞና
ናንጉዎቲ።

3 ማቾ ሃሃ ዓሢ ማዒባኣያና ላሂሢ፡ ቦርሲሳ ማዶ፡ ዓሲሮ ዛጊ
ሱኡካዲሢ ማዔቲያ ዒንሢ ባኣካ ጴዶፓ፤ ዬይ ጌኤቪ ማዔ፡
ጾኣዛሢ ዴሬም ኮይሳ ማዶቲዎሴ፤

4 ዒንሢ ጾኦሲ ጋላታንዳኣፓዓቲም ቦርሲሳ ባኣዚና ፓሃ ባኣዚባኣ
ጊኢጉዎ ሃይሴ ጌሰታንዳያ ኮይሱዎሴ።

5 ማቾ ሃሃ ዓሢ ማዒባኣያና ላሃያኮ፡ ቦርሲሳ ማዶ ማዶያኮ፡ ሜሌ
ካኣቪ ካኣቫከሢጉዲ ዓሲሮ ዛጊ ሱኡካዲ ዓሲኮ ኪሪሰቶሴና ጾኦሲ
ካኣቲሞናይዳ ቤሲባኣያ ማዓንዳሢ ዔሩዎቲ።

6 ዬንሢ ባኮንሢ ዛሎና ጾኦሲም ዓይሢንቲዎ ዓሶ ዑፃ ዒዛኮ
ጎሪንቲ ሙካንዳሢሮ ጾኦሲያ ዒንሢ ጉሪ ማዔ ሃይሴና ጌቫፓ።

7 ዬያሮ ዬንሢ፡ ዒዛም ዓይሢንቲዎ ዓሶና ዎላ ፔቲ ማዒፖቲ።

8 ቤርታ ዒንሢ ዲሚዳ ናንጋኔ፤ ሃሢ ጋዓንቲ ጎዳና ፖዓ ዒንሢ
ዓኣሢሮ ፖፖ ዓሳ ናንጋ ጎይፖ ናንጉዎቲ።

9 ዓይጎሮ ጌዔቲ ኮቩሞ ቢያ፤ ጂሎሞንታ ጎኡሞንታኮዎ ዓኣፒ
ጴዳሢ ፖዒዳፓኬ።

10 ዬያሮ ጎዳ ዎዛሳያ ማዓ ባካ ዓይጎታቲያ ዲማሲ ዔሩዎቲ።

11 ዓኣፒባኣ ዲሞ ማዶ ዒንሢያ ማዶያ ማዒፖቲ፤ ፖዓ ኬሲ
ፔጋሲ ዲውዎቲ።

12 ዲሞ ማዶ ማዶ ዓሳ ዓኣቹ ማዶ ባኮ ዛሎ ኬኤዛኒታፖ
ቦርሳያኬ።

13 ቢያ ባኣዚ ፖዒዳ ኬሰካዛ ዬይ ዓይጎ ማዔቲያ ጌኤቫኪ
ዔርታኔ።

14 ዎይቲ ጌዔቲ ቢያ ባኣዚ ፔጋሲ ዲዎሢ ፖዒታሢሮኬ፤ ዬያሮ፡-
«ኔኤኒ ሃይ ጊንዓሃ ጴጩ። ሃይባፓ ዔቄ!

4:32 ቆላ. 3:13። 5:2 ኬሲ. ማፃ 29:18፤ ዓይኑ. 40:6።

ከሪሰቶሴ ኔኤም ፖላንዳኔ» ገይነቱ።

15 ዓካሪ ዲንሢ ምሳይዲ ናንጋንዳቲያ ኮሺ ማሉዋቲ፤ ዔራ ዓሲ ማዑዋቲ፤ ዔኤያ ዓሲ ጎይሢ ናንገፖቲ።

16 ሃይ ዋዳ ፑርታ ማዔሢሮ ዓይጎ ካራና ማዔቲያ ዲንሢ ዳንቄ ዋደማና ማዳ ባኮ ዔሪ ማዲዋቲ።

17 ዬያሮ ጎዳኮ ማሊፃ ዓይጎታቲያ ዔራያ ማዑዋቲ፤ ዔኤያ ማዲፖቲ።

18 ዲንሢ ባይሲንታ ባንሢ ዔኪ ዓኣዲያታሢሮ ዳጋሢ ዑሺና ማሢንቲፖቲ፤ ዬያይዳፓ ዓያና ገኤሺ ቢታንቶ ዳሞ ገሊያ ማዑዋቲ።

19 ጾኦሲም ማዓ ዓይኑሞና ጾኦሲ ሄርሺ ሄርሺ ዲንሢ ዋላ ቡኩ ዋደና ዓይናዲዋቲ፤ ዬያይዲ ዲኔፓ ጎዳ ጋላቲዋቲ።

20 ኑ ጎዳሢ ዬሱሰ ከሪሰቶሴ ሱንጾና ቢያ ባኣዚሮ ጾኦሲ፣ ዓዳሢ ቢያ ዋዳ ጋላቲዋቲ።

21 ከሪሰቶሴ ቦንቸሮ ገዒ ዲንሢ ፔቲ ፔቲሢ ዋሊም ዓይሢንታያ ማዑዋቲ።

ዓኒና ማቸና ዛላ

22 ዲንሢ፣ ለኣሎ ናኣታ! ጎዳ ዬሱሴም ዲንሢ ዓይሢንታሢፊዲ ዲንሢኮ ዓኒንሢም ዓይሢንቲዋቲ፤

23 ዓይጎሮ ገዔቲ ከሪሰቶሴ ሺኢጲጾ ማኣሮ ዓሶኮ ዑፃ ቶኦኪ ማዔሢፊዲ ዓኒያ ማቸኮ ቶኦኪኬ፤ ዬያጉዲ ከሪሰቶሴ ፔኤኮ ዑፆ ማዔ፣ ሺኢጲጾ ማኣሮ ዓሶ ዳቂሻሢኬ።

24 ሺኢጲጾ ማኣሮ ዓሳ ከሪሰቶሴም ዓይሢንታሢፊዲ ማቸንሢ ቢያ ባኣዚና ፔ ዓኒንሢም ዓይሢንቶንጎ።

25 ዲንሢ፣ ዓቲንቃ! ከሪሰቶሴ ሺኢጲጾ ማኣሮ ዓሶ ናሽኬሢና ፔ ቶኦኮዋ ዔያቶ ጋቲ ሃይቢም ዓኣሢ ዲንገሢፊዲ ዲንሢያ ዲንሢ ለኣሎ ናሽኮዋቲ፤

26 ከሪሰቶሴ ዬያ ማዳሢ ሺኢጲጾ ማኣሮ ዓሳ ጾኦሲም ዲማዳያ ማዓንዳጉዲ ገይኬ፤ ዒ ዔያቶ ጾኦሲም ዲማሴሢያ ቃኣሎ ዛሎና ሃሣ ዋኣሢናኣ ማሰኪ ገኤሺኬ።

27 ዬያይዲ፡- ከንሢ፣ ዓኣፒ ካራ ቱኪሢ፣ ፑርታ ባኣዚያ ፔቲታፆ ባኣያ፣ ገኤሺ፤ ሃሣ ማዛጲ ሺኢጲሢ ማኣሪ ዓሲ ማሂ ፔ ቤርቶ ዲንሢ ዒ ሺኢሻኒኬ።

5:16 ቆላ. 4:5። 5:20 ቆላ. 3:16-17። 5:22 ቆላ. 3:18፤ 1ጴ፪. 3:1።
5:25 ቆላ. 3:19፤ 1ጴ፪. 3:7።

28 ዓረንሣ ፔና ናሽካሣጉዴያ ፔ ማቸንሣ ናሽካኒ ኮይሳኔ፤ ፔ ማቸ ናሽካሣ ፔና ናሽካኔ።

29 ዎይቲ ጌዔቲ ፔና ዒፃ ዓሲ ያኣኒያ ባኣሴ፤ ጋዓንቴ ኪሪሰቶሴ ሺኢጲያ ማኣር ዓሶ ሙኡዚ ሙኡዚ ካፓ ጎይያ ዒዚ ሙኡዚ ሙዒ ሙዒ ፔናኣ ካፓኔ።

30 ኑኡኒ ኪሪሰቶሴ ዑያኮ ዲማ ዲማ ቤዘኬ፤

31 «ዓሲ ዬያር ዓዶና ዒንዶና ሃሺ ማቸና ዎላ ፔቲ ማዓኔ፤ ላምያንሣያ ፔቲ ዓሲ ዑሣጉዲ ማዓኔ» ጌይንቴኔ።

32 ዬይ ዴኤፒ ዓኣሺንቴ ባኣዚኬ፤ ሃያ ታ ጋዓሣ ኪሪሰቶሴና ሺኢጲያ ማኣር ዓሶና ማላታ ማሂኬ።

33 ጋዓንቴ ሃይ ባካ ዒንሣማ ማዓያኬ፤ ዬያር ዓኒ ፔ ማቸ ፔናጉዲ ማሂ ናሽኮንጎ፤ ማቻኣ ዓኒ ቦንቸንጎ።

6

ናኣቶና ሸዔ ዓሶና ዘላ

1 ናይዮቲ! ጎዳ ዬሱሴር ዒንሣ ማዔ ጎይያና ዒንሣ ሸዔ ዓሶም ዓይሣንቱዎቲ፤ ዓይጎር ጌዔቲ ዬይ ባካ ኮይሳያታሣርኬ።

2 «ኔ ዓዶና ኔ ዒንዶና ቦንቹ» ጋዓ ቤርታኣ ዓይሣይይዳ ዓኣ ሃጊ ማዓ ዎዛ፤

3 «ቢያ ባኣዚ ኔኤም ኮሽካንዳኔ፤ ናንጎ ሌዓኣ ሳዓ ኔኤም ያዶቃንዳኔ» ጋዓያኬ።

4 ዒንሣ ሸዔ ዓሳ! ጎዳ ዬሱሴ ኪሪሰቶሴ ዓይሣ ዓይሣያ ጎይያ ዘሪ ዲቹዎቲ፤ ናኣቶ ዒንሣኮ ጎሪ ዳጋሲሣና ፑርቱሞ ማሊሲሪፖቲ።

ማዲሻ ዓሲና ዓይሌና ዘላ

5 ዓሲም ዓይሌ ማዒ ማዳዘንሣዮቲ! ዒንሣ ማዲሻያ ማዔ ዓሶም ዓጊቹሞና ቦንቹ ዓይሣንቱዎቲ፤ ኪሪሰቶሴም ዒንሣ ማዳ ጎይያ ፒዜ ዒናና ዓይሣንቱዎቲ።

6 ዒንሣ ዓይሣንታንዳሣያ ያኣሲ ማሊያ ዒናፓ ኩንሣ፤ ኪሪሰቶሴም ማዳ ዓሶጉዲ ማዓንዳኣፓዓቲም ዓሲ ዎዛሳኒ ጌዒ ዓሲ ቤርቲም ጴዲሣር ማያፓ።

7 ዓሲም ማዒ ባኣንቴ ጎዳ ዬሱሴ ኪሪሰቶሴም ማዳያ ማዒ ናሽኪ ኮሺ ማሊሣና ማዲዎቲ።

5:31 ማዢ. ማፃ 2:24። 6:1 ቆላ. 3:20። 6:3 ኬሲ. ማፃ 20:12፤ ላሚ. ዎማ 5:16። 6:4 ቆላ. 3:22-25።

8 ዓይጎር ጌዔቴ ዓይላሢ ማዔቴያ ማዲሻሢ ፔቴ ፔቴሢ ማዳ ኮዡ ማደር ጎዳ ዩሱሴ ኮይላፓ ዒንጊንታ ባኣዚ ዔካንዳያ ማዔሢ ዒንሢ ዔራኔ።

9 ሃሣ ዒንሢ ዓሶ ማዲሻ ዓሳ! ዓሲ ደማሱዋ፥ ዒንሢንታ ዔያቶንታኮ ጎዳ ጩሪንጮይዳ ዓኣሢ ዔሪ ዔያቶ ደቃሢያ ሃሺጋፓ ዒንሢም ማዳ ዓሶም ኮሺ ማዲዋቴ።

ጾኦሲ ዒንጋ ሶሎ ዓንጋሞ

10 ዓካሪ ጎዳና ዒዛኮ ዴኤፖ ዋልቆና ደዲዋቴ፤

11 ፃላሂኮ ጌኖ ማዳ ዒንሢ ባሻኒ ዳንዳዓንዳጉዲ ጾኦሲ ዒንጋ ሶሎ ዓንጋሞ ቢያ ዓርቁዋቴ።

12 ዓይጎር ጌዔቴ ኦኡኮ ሶላ ዓሲናቴዋንቴ ሃያ ደሞ ዓጮ ዋይሣ፥ ቢቶ ማዔያ፤ ሃሣ ሃያ ዓጮኮ ዋልቆ ማዔያ፥ ሳፆ ዑፃ ዢባራ ዓኣ ፑርቶ ዓያኖናኬ።

13 ዩያር ጾኦሲ ዒንጋ ሶሎ ዓንጋሞ ጉቤ ዓርቁዋቴ! ዩያይዲ ፑርታ ኬሊ ዒንሢ ሄላኣና ዒንሢ ሞርካሢኮ ዋልቆ ቃዚ ጋፒንፆ ሄላኒ ሶሊሰካፓ ደዲ ዒንሢ ዔቃኒ ዳንዳዓኔ።

14 ዓካሪ ጸኢቶ ዓርቃ ቡራሾጉዲ ጎኡሞ ኬርና ቴኡቴ፥ ጸሎሞዋ ሶሎር ዳዳ ማኦፆ ዓንጎጉዲ ማይንቴ፥

15 ኮዡ ሃይሶ ቃኣሎ ቶካ ዲርሲጉዲ ዓኣሢ፥ ጊኢጊ ዔቁዋቴ፤

16 ሃሣ ታሚ ሎሰቶጉዲ ዔኤታ፥ ፃላሂኮ ፓልፆ ሜንሣኒ ዳንዳዓንዳጉዲ ቢያፓ ዑሣ ማዔ ጉሙርቁፆ ጊቲማ ማሂ ዓርቁዋቴ።

17 ዩያጉዲ ሃሣ ዳቂንቶ ቶኣካ ዓጎ ሶሎ ዓንጎ ቆኦሶጉዲ ዓጊ፥ ጾኦሲኮ ቃኣሎዋ ዓያና ጌኤሺ ጩንቻ ዓፓር ማሂ ዓርቁዋቴ።

18 ዒንሢም ኮይሳ ባኮ ቢያ ዒንሢ ሺኢቃኣና ዓያና ጌኤሺና ቢያ ዋዴ ሺኢቁዋቴ፤ ዩያይዲ ደዲ ጴጩዋቴ፤ ኪሶሰቶሴ ጉሙርቃ ዓሶማኣ ቢያ ዋሉዋፆ ሺኢቁዋቴ፤

19 ኮዡ ሃይሶኮ ዓኣሺንቴ ባኮ ዒጊጩዋፆ ታኣኒ ዓሶ ዔርዛንዳጉዲ፤ ሃሣ ታ ኬኤዛ ዋደና ኮይሳ ቃኣላ ታኣም ዒንጊንታንዳጉዲ ሺኢቁዋቴ።

20 ሃሢያ ታ ካኖ ቢራቶና ቴኡቴ ዓኣፆ ዩያ ኮዡ ሃይሶኮ ታኣኒ ኪኢታ ዓሲኬ፤ ዩያር ታኣም ኮይሳሢጉዲ ዒጊጩዋፆ ታኣኒ ኬኤዛንዳጉዲ ሺኢቁዋቴ።

ጋፒንፆ ሳራሢያ

6:9 ለሚ. ዋማ 10:17፤ ቆላ. 3:25፤ 4:1። 6:14 ዒ.ሲ. 11:5፤ 59:17። 6:15 ዒ.ሲ. 52:7። 6:17 ዒ.ሲ. 59:17።

21 ኑ ዒዛ ናሽካ፣ ኑኡኮ ዒሻሢ፣ ጎዳ ዩሱሰ ኪሪሰቶሴ ማዶ ጉሙርቁንቲ ማዶያ ማዔሢ፣ ቲኪቆሴ ታ ዛሎ፤ ሃሃ ታ ዓይጎ ማዶቲያ ዒንሢ ዋይዛንዳጉዲ ቢያ ባኮ ዒንሢም ዒ ኬኤዛንዳኔ።

22 ዩያር ኑኡኒ ዋይቲ ዓኣቲያ ዒንሢ ዔራንዳጉዲና ዒንሢያ ዒ ደዲሻንዳጉዲ ጌዒ ዒዛ ታ ዒንሢ ኮይላ ዳኬኔ።

23 ያኦሲ፣ ዓዳሢና ጎዳ ዩሱሰ ኪሪሰቶሴናይዳፓ ማዔ ኮሹሞና ናሹሞና ሃሃ ጉሙርቁሢና ዋላ ኪሪሰቶሴ ጉሙርቃዘንሢም ቢያ ማዶንጎ።

24 ጋፑዋ ናሹሞና ኑ ጎዳ፣ ዩሱሰ ኪሪሰቶሴ ጉሙርቁ ናሽካዘንሢም ቢያ ያኦሲኮ ኮሹሞ ዒንጊፃ ዒንጊንቴያ ማዶንጎ።

6:21 ዳኪ. ማዶ 20:4፤ 2፯ሞ. 4:12።

6:22 ቆላ. 4:7-8።

ጌኤዢ ማግኔግ
The Holy Bible in the Maale language of Ethiopia,
using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌኤዢ ማግኔግ

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

bbcfb90a-3ae3-5452-983d-6c4c02375929